

## Oqaaseqaatit nalinginnaasut

### 1. Aallaqqaasiut

#### *1. Aallarniutaasutut oqaaseqaatit*

Siunnersuut periarfissiivoq, takornariartitsinermik ingerlataqartut sumiiffiup tigussaasup aalajangersimasup iluani takornariartitsinermi niuerutissamik arlalinnilluunniit tunniussinissaminnut akuersissuteqarsinnaanngorlugit. Takornariartitsinermik ingerlataqartut inuussutissarsiummi pisariaqartitanik aningaasaliissuteqarnerisigut, taamaaliornikkullu sullivanik annertunerusunik najugaqarfimmilu siuarsaanermik pilersitsinerisigut piffissamut ungasissumut ineriartortitsinissamut sinaakkutissiornissaq siunnersuummut pingaernerutitatu anguniagaavoq. Taamaalilluni takornariartitsinermik inuussutissarsiornermi sammisani erseqqinnerusumik killilersimasuni aalajangersimasuni annertunerusumik iliuseqarlunilu suliaqarnerunissaq siunnersuummi pineqarput.

Takornariartitsinermi ingerlatanut akuersissummi piginnaatitsissummik pigisaqartut ataasiakkaat aningaasarsiornikkut pissarsiorinissaminnut periarfissinneqassapput, taamattaarlu naatsorsuutigineqarluni Nunatta Karsia saniatigut aningaasarsiornikkut pissarsissasoq, assersuutigalugu akileraarutitigut.

#### *2. Siunnersuutip tunuliaqutai*

Takornariartitsinermik inuussutissarsiuqartut ukiuni arlaqalersuni takornariartitsinermik ingerlataqarnermi siunissamut ungasinnerusumut aningaasaliissuteqarnissaminnut pitsaanerusunik atugassaqartinneqarnissartik kissaatigisarsimavaat. Takornariartitsinermik inuussutissarsiuqartut, nunap sannaatigut sumiiffinni erseqqinnerusumik aalajangerneqarsimasuni immikkut ingerlataqarnissaminnut pisinnaatitsissutinik angusaqarusullutik kissaatigaat. Periarfissaq tamanna ullumikkut suli pilersinneqarsimangilaq, taamaattumillu kinaluunniit nunaminertamik pilersitsivissamut akuersissummik pigisaqartoq sumiluunniit pilersitsisinnaalluni.

Tamatuma kingunerissavaa pimoorussilluni aningaasaliiniartoq soorlu assersuutigalugu illuaqqanik pilersitsinissamut akuersissummik pissarsisimasoq takornariallu amerlanerusut pissarsiariniarlugit nunaminertamik kajungernarsaaniarluni assigiinngitsutigut suliniuteqarsimasoq aningaasaliinerminut illersorneqanngilaq, tassa kikkulluunniit sumiiffimmuut tamaanga takornariartitsisinnaammata sumiiffillu atorlugu, tamatumunnga peqataanngikkaluarluni.

Inuinnaat aningaasalersuinissaannut periarfissanik piumasaqaatit patajaatsuunissaat qulakkeernerisigut inuiaqatigiit aningaasarsiornerisa tungaannit isigalugu taamattaaq iluaqutaasinnaavoq. Takornariartitsinermik ingerlataqarnermut akuersissutit Kalaallit Nunaanni takornariartitsinermi misigisassat naleqarnerulernissaannut pitsaanerusunik

periarfissiisoqartussaavoq. Kaaviiartitat suliffiillu amerlinerisigut taamattaq landskarsimut isertitaqartitsinissamut periarfisseeqataasinnaavoq.

### *3. Inatsisit atuuttut*

Piffissap matuma nalaani takornariartitsinermi niuerutissanik tunniussinissamut akuersissutinik naleqqussaasumik inatsimmik pigisaqartoqanngilaq. Kalaallit Nunaanni sukisaarsaatigalugu eqalunniarnissaq siunertaralugu kuummut aalajangersimasumut imaluunniit imartamut erseqqinnerusumik killilersimasumut akuersissutinik tunniussisarnerit pillugit naleqqussaasumik inatsimmik atuuttoqarpoq.

### 2. Siunnersuummut immikkoortut pingaarnerit

Inatsisissatut siunnersuutip pingaarnertut siunertaraa Kalaallit Nunaata takornariartitsinermi inuussutissarsiornerup ineriartorneranut peqataanissaq inuiaqatigiinnilu siuariartornermik pilersitsinissaq, takornariartitsinermi niuerutissanik tuniniaanerup siuarsarneratigut. Tamanna pissaaq sumiiffiit ilaanni takornariartitsinermik inuussutissarsiuteqartut akuersissummik pissarsitinnerisigut takornariartitsinermi sammisaqartut periarfissillugit. Ingerlatat nutaat kisiisa ineriartortinneqarnissaat inatsisip siunertarinngilaa, aammali ingerlatat pioreersut tapersersussallugit ineriartorteqqissallugillu.

Inatsisissatut siunnersuut pisinnaatitsissummik imaqarpoq, Naalakkersuisut takornariartitsinermi ingerlataqarnermi inunnut suliffeqarfinnullu akuersissutinik tunniussisinnaasut, taamaaliornikkut piginnaatitsissummik pigisaqalerlutik, pisinnaatitaaffinnillu pisussaaffinnillu ilaatigut pissarsissallutik.

### *4. Oqartussat suliarinnittarnerat*

Inatsisissatut siunnersuut malillugu takornariartitsinermi ingerlatassanut akuersissutinik tunniussisarnermi kiisalu tamakkununga atatillugu oqartussatut suliarinnittarnerut Naalakkersuisut oqartussatut akisussaasuupput. Takornariartitsinermi ingerlatassanut akuersissuteqartarnerup tungaanut Naalakkersuisut oqartussaanelermik ingerlatsisuutinnerisigut nunamut tamarmut periusissaq assigiissaartoq anguneqassaaq.

Takornariartitsinermi ingerlataqarnissamut akuersissut taamaallaat sumiiffimmut tunniunneqarsinnaavoq, akuersissut malillugu ingerlatat isumagineqarneranni pilersaarusiortarneq aamma nunaminertanik atuisarneq pillugu inatsisartut inatsisaat kiisalu inatsit malillugu pilersaarutit aalajangersakkallu allat aalajannerneqarsimasut aammalu inatsit malillugu aalajangerneqarsimasut malillugit ingerlanneqassappata. Nunaminertanut imaluunniit pilersaarusiornernut oqartussaasut, apeqqutit tamakku pillugit aalajangiisussaataapput, tassalu kommunalbestyrelsi imaluunniit Naalakkersuisut.

### 3. Aningaasarsiornermi allaffissornikkullu pisortanut kingunerisassat

Siunnersuutip pisortanut aningaasarsiornikkut pitsaasunik kinguneqarnissaa siunertaraa. Tamanna suliffiit kaaviiartitallu amerlisinnerisigut pinissaa naatsorsuutigineqarneruvoq.

Takornariartitsinermik ingerlataqarnissamut akuersissummik piginnaatitsissummik pigisaqartoq Namminersorlutik Oqartussanut imaluunniit oqartussanut allanut akiliuteqartassasoq Naalakkersuisut malittarisassanik aamma akuersissuteqarnissamut piunasaqaatit pillugit aalajangersaasinnaanerinik aammattaaq periarfissippaat. Periarfissat taassuma atorluarnissaanut apeqqutaassapput ingerlatassap aalajangersimasup suunera, tamakkununga ilaallutik iluanaarutinik pilersitsinissanut periarfissaq.

Pisortanut kingunerisassat pitsaasut missingissallugit periarfissaqanngilaq, piginnaatitsisutit pigisaqartut amerlassusissaat kiisalu ingerlatat annertussusissaat pissarsissutiginnissaallu apeqqutaassammata.

Siunnersuut sulisutigut isumalluutinik atuinissamik Naalakkersuisunut kinguneqassaaq. Inatsisissatut missiliuut sinaakkutissatut inatsisaavoq, akuersissuseeriaatsimik tunngaveqartoq. Taamaammat nalunaarutinik akuersissutinillu ilusilersuinissaq pisariaqartinneqassaaq. Sumiiffinni killilersukkani takornariartitsinermi niuerutissanik tunisarneq pillugu nalunaarutinik suliarinnittoqassaaq. Taassuma kingorna tamanut qinnuteqaqqusinnissat pillugit nalunaarutinik tamanut saqqummiussineqassaaq, takornariartitsinermi ingerlatassanut qinnuteqaatit suliarineqassallutik akuersissutinillu tunniunneqassallutik. Tamakku saniatigut akuersissutit malillugit ingerlatassat naleqqussarneqarnissaannut piffissamik atuisoqassaaq, tamakkununga ilaallutik aaqqiissummik misissuisarneq/nakkutilliisarneq. AC-fuldmægtigimut ukiup affaani suliaqarnissaq aallaavittut piffissatigut atorneqassasoq nalilerneqarpoq.

#### 4. Suliffeqarfiutilinnut aningaasarsiornikkut allaffissornikkullu kingunerisassat

Takornariartitsinermik ingerlataqartut aningaasalersuinissaannut periarfissatigut atukkat pitsaanerit siunertaralugit siunnersuut saqqummiunneqarpoq, taamaammat suliffeqarfiutilinnut aningaasarsiornikkut pitsaasunik kinguneqarnissaa naatsorsuutigineqarpoq, Kalaallit Nunaanni takornariartitsinermik inuussutissarsiornerup iluani kaaviiartitat amerlinerisigut. Aningaasarsiornikkut pissarsissutaasussat qanoq amerlatiginissaat naatsorsornissaat periarfissaqanngilaq, aaqqiissutip qanoq iluatsiginissaa apeqqutaassammata. Takornariartitsinermi nioqqutissanik sullinniakkat tassaassanganneqarput takornariat pisisinnaassuseqarluartut, naatsorsuutigineqarporlu takornariat tamakku sumiiffikkaani aningaasarsiornikkut kaaviiartitsinermik aamma pilersitsissasut. Taamaammat malitsigisatut sunniutaasinnaasut tassaassapput akunnittarfinni unnuinerit, neriniartarfinni nerinerit, kalaallit sanalugaannik eqqumiitsuliaannillu il.il. tuniniaanerit.

Aaqqiissut piginnaatitsissummik pigisaqartumut aningaasarsiornikkut kinguneqarsinnaavoq, landskarsimut akitsuutinik akiliisoqartussaammata, aalajangersimasumik neqerooruteqartitsinermut atatillugu pisinnaatitaaneq Naalakkersuisut atorluassappassuk.

Takornariatitsinermi ingerlatassanut akuersissummik pigisaqartumut ingerlatsinikkut kingunerisassai tassa akuersissummik tunniussaqaarnermut atatillugu piumasaqaatinik malinninnissamik, tamatumunnga ilaallutik soorlu assersuutigalugu siunnersuutip aalajangersagai, tassa nalunaarusiornikkut assigisaatigullu uppernarsaaneq. Inatsit manna sumiiffinni aalajangersimasuni periarfissiisaaq, piginnaatitsissummik pigisaqartumut kisermaassilluni takornariatitsinermi ingerlatassanut ilaasunut akuersissutip isumaginissaanut akuerineqartumut. Tamatumani qulakkeerneqassaaq sumiiffimmi ataatsimi niuernikkut najoqqutap ineriartortinnissaanut periarfissaqaarnissaaq kiisalu nierneramik ingerlataqartut allat aningaasaliissuteqaqqaaratik niuernermik tamatumunnga atuinnginnissaat. Inatsilli sumiiffinni allani takornariatitsinermi nioqqutissanik assingusunik neqerooruteqaarnissamut akornutissaqartitsinngilaq.

#### 5. Avatangiisinut, pinngortitamut innuttaasullu peqqissusiinut kingunerisassat

Siunnersuummi § 24-imi aalajangersarneqarpoq takornarianut tunisassiat neqeroorutiginerini, tuninerini tunniunnerinilu isumanaallisaanermut peqqissutimullu ajoqutaanngitsumik akisussaassuseqartumillu ingerlatsisoqassasoq. Taamaattumik siunnersuutip avatangiisinut pinngortitamullu ajoqusiinissaa naatsorsuutigineqanngilaq.

#### 6. Innuttaasunut kingunerisassat

Siunnersuut innuttaasunut kinguneqassanngilaq. Taamaammat suli aallaaniarsinnaatitaasoqassaaq, aalisartoqarsinnaatitaasoqassaaq qimussertoqarsinnaatitaasoqassaaq, kiisalu pinngortitamiisinnaatitaasoqarluni tamakkununnga malittarisassat nalinginnaasut malillugit suliaqarsinnaallutik, naak sumiiffik pineqartoq ingerlatarlu pineqartoq akuersissuteqaarnissamut piumasaqaammut ilaagaluartoq. Akuersissuteqaarnissamut piumasaqaat taamaallaat atuutissaaq takornariatitsinermi niuerutissanik tunniussinerit eqqarsaatigalugit, ingerlatallu taaneqartut assersuutigalugu takornariatitsinermi niuerutissat nassuiarneqarnerisa avataaniippata, inullu tamakkuninnga sammisaqartoq sammisamik ingerlataqarniarluni inummut allamut akiliuteqarsimanani.

Piginnaatitsissummik pigisaqartup sumiiffimmi aalajangersimasumi takornariatitsinemi ingerlatassamut akuersissummik pissarsinerani innuttaasut nalinginnaasut killeqartuinnarmik sunniuteqarfigineqarnissaat naatsorsuutigineqarpoq, soorlu innuttaasut ataasiakkaat misigisinnaallugu sumiiffimmi aalajangersimasumi inuit aalisariartut, aallaaniartut allatulluunniit takornariatitsinermi niuerutinut ilaasunut sammisaqartut amerlanerulersimaneri.

#### 7. Kingunerisassat allat pingaaruteqartut

Siunnersuut kingunerisassanik pingaaruteqartunik allanik kinguneqassanngilaq.

#### 8. Oqartussanik kattuffinnillu il.il. tusarniaaneq

Inatsisissatut siunnersuut piffissami 28. juni 2012 – 30. juli 2012 makkununnga tusarniaassutigineqarsimavoq: KANUKOKA, GA, KNAPK, SIK, ICC, Kommuneqarfiit,

GB, VG, Aningaasarsiornermut Naalackersuisoqarfik, Piniarnermut, Aalisarnermut Nunalerinermullu Naalackersuisoqarfik, Nunamut namminermut Tunngasunut Naalackersuisoqarfik, Ineqarnermut Attaveqarnermullu Naalackersuisoqarfik. Kiisalu siunnersuut Namminersornerullutik Oqartussat qarasaasiatigut nittartagaatigut, kikkut tamarmik isertisergisinnaasaatigut, tusarniaaassutigineqarpoq.

Tusarniaanermi akissutinik makkunannga tigusaqartoqarsimavoq: Nunamut namminermut, Pinngortitamut Avatangiisinullu Naalackersuisoqarfik, Teknikkimut aamma Nuna tamakkerlugu Pilersaarusionsornermut Immikkoortoqarfik, Kommune Kujalleq, Qeqqata Kommunia, Kommuneqarfik Sermersooq, Qaasuitsup Kommunia, Inuit Circumpolar Council, Kalaallit Nunaanni Sulisitsisut Kattuffiat (GA), Unammilleqatigiinnermut Nakkutilliisoqarfik, KANUKOKA, DEG, Visit Greenland, Qeqqata Erhvervsråd, Inuit Outfitting ApS, Ivalu Guldager.

Tusarniaanermi akissutit tulluartauneri apeqqutaatillugit eqqarsaatigineqarlutik ilanngunneqarput oqaaseqaateqarfigneqarlutillu. Tusarniaanermi akissutit oqaaseqaateqarfigneqarneri uingasumik allanneqarput.

Tusarniaanermut akissutit tamarmik tamamiutillugit Inatsisartuni ataatsimiititanut susassaqtartunut ilanngullugit nassiunneqarnikuupput.

*Inatsisissatut siunnersuummik KANUKOKA aamma Qeqqata Kommunia iluarisimaarinnillutik nalunaarput, Kalaallit Nunaannut tamarmut iluaqutaasussamik takornariartitsinermik inuussutissarsiummik aningaasaqarnikkut piujuartitsisumik pilersitsisinnaanermut periarfissat isumannaarnerisigut takornariartitsinermik inuussutissarsiummut sinaakkutissatut piumasagaatit annertuumik pitsanngorsarnissaannik nassataqassasoq isumaqaramik.*

*Immikkoortortanut timitalinnut toqqartukkanut § 1-ip tunngasuunera siunnersuummi erseqqissumik allanneqarsimasariaqartoq Kalaallit Nunaanni Sulisitsisut Kattuffiata nalunaarutigaa.*

Tamanna taaguutaata allannortinneratigut akuerineqarpoq.

*Qeqqata Kommuniata § 3-mi tullerriarneqartut Naalackersuisut takornariaqarnermi sulianik tamanik akuersissuteqarnertigut aqutsinissaannut tunngavissiisutitut eqqarsaatigineqannginerata naqissuserneqarnissaa qinnutigaa, Unammilleqatigiinnermullu Nakkutilliisoqarfiup nalorninartoqartippaa siunnersuut sulianut arlalinnut akuersissuteqartarnissamut, imatorsuaq aningaasaliinissamik pisariaqartitsinngitsunut ammaasuunera.*

Tamanna § 3-p allannortinneratigut akuerineqarpoq. Siunnersuut taamaallaat akuersissuummik agguaaasinnaatitsivoq, siunertarineqanngilarlu takornariaqarnermut suliat tamarmik akuersissuteqarfiunissaat.

*§ 6, imm. 3-mut tunngatillugu siunnersuutip taamatut iluseqarneratigut assersuutigalugu suliamik akuersissuteqarfiginngisavimmik niuertuunngitsut immikkoortortamut akuersissuteqarfiusumut tikeraanik assartuisinnaanerak, tikeraat pineqartut sulianik akilinngisaminnik, tunngaviatigut sulianut akuersissutaasunut assingusunik suliaqarsinnaanerannik ammaasoqarnera Qeqqata Inuussutissarsiutitigut Siunnersoqatigiivisa, Kommuneqarfik Sermersuup aamma Visit Greenlandip uparuarpaat. Najugaqarfimmiut pinngortitamillutillu taassuminnga atuisinnaanermik pisinnaatitaaffeqartuarnissaasa erseqqissaaviginissaat Kommune Kujalliup aamma Inuit Circumpolar Councilip kissaatigaat.*

Sumiiffimmi aalajangersimasumi takornariaqarnermi suliamut akuersissummik nalunaaruteqarnissamut siunnersuut periarfissiivoq, Kalaallit Nunaannili pinngortitami inuit namminerisaminnik angalaarnissaannik imaluunniit killilersugaanani angalaarnissamut pisinnaatitsineq killilersuiviginngilaa. Nammineq inuttut namminerisamik sullississummik pisiaqarani suliaqarnissamik toqqartuigaanni tamanna suli periarfissaqarpoq. Immikkoortortamut angalaarnivik suliamik akuersissummik illersukkamik imaqarsinnaanngilaq. Siunnersuummi inuit Kalaallit Nunaanni najugalinnik najugaqanngitsunilluunniit immikkoortitsinngilaq, siunnersuummi takornariap nassuiaaviginera pissutigalugu suminngaanneersuugaluaaraanniluunniit takornariaasinnaasoqarmat, kikkullu tamarmik Kalaallit Nunaanni pinngortitami killilersugaanngitsumik angalaarsinnaatitaammata.

*Najugaqarfigisami pilersaarusiornissamut oqartussaaffeqarnermut kommunit piginnaassuseqarnerat, aammalu pilersaarusiornermut tunngatillugu oqartussaaffeqarfiit erseqqissaavigineqartariaqarnerat KANUKOKA-p, Kommune Kujalliup, Kommuneqarfik Sermersuup, Qaasuitsup Kommuniata, Qeqqata Kommuniata aamma Nunamut namminerimut, Pinngortitamut Avatangiisinullu Naalakkersuisoqarfiup nalunaarpaat, pilersaarusiornermut oqartussaaffiit piginnaasaqarfiinik allannguuteqartoqassanersoq erseqqarinngimmat, kommunillu periarfissanut pisariaqartitanullu tunngatillugu najugaqarfimminni ilisimasaqartuummata. Qeqqata Inuussutissarsiutitigut Siunnersoqatigiivisa kissaatigaat akuersissutinik neqerooruteqarnermut atatillugu suliaqartut siammarsimasut ilanngunneqartarnissaat.*

§ 8, imm. 2-p allanngortinneratigut tamanna akuerineqarpoq, taamaalilluni pilersaarusiornermik oqartussaasut piginnaatitaaffiinik allannguisoqannginnera erseqqissaavigineqarluni.

Pisortani oqartussaaffiit immikkoortortami akuersissumut piumasaqaatinik aalajangersaasuupput, tassaammata isumalluutit tamanik pineqartut, suliffeqarfimmut namminersortumut atugassiaasut. Piumasaqaatit assigiaartuunissaat pillugu Naalakkersuisut neqeroortitsinermut atugassialiorput, neqeroortitsinerullu kingornatigut takornariartitsinermut suliamut akuersissummik Naalakkersuisut nalunaaruteqarput. Neqeroortitsinermut atugassiat

akuersissumut piumasaqaatitallit Inuussutissarsiornermut Suliffeqarnermullu Naalackersuisoqarfimmit suliarineqarput, kommunilu attuumassuteqarfiusoq suliamut ilanngunneqassalluni.

*Akuersissutit annertuunik aningaasaliissuteqarnernik nassataqarsinnaasut Kommune Kujalliup tikkuarpaa, isumannaarneqassaarli inatsit kisermaassilersitsissanngitsoq nalinginnarmillu unammillernermik unitsitsissanngitsoq. Kisermaassisitsineq aqqutigalugu takornariartitsisartut angisoorsuit pilersinneqareersimasullu inatsisissatut siunnersuutip sallitikkai Qaasuitsup Kommuniata aamma Ivalu Guldagerip nalunaarpaat.*

Siunnersuutip kisermaassaqaalernissaq imaluunniit aallarnisaanermik unitsitsiniarnissaq anguniagarinngilai, parlattuanilli suliniutinik aalajangersimasunik angissusilinnik tapersersuiniarpoq, suliniutip ineriartortinnissaanut kisermaassisinnaatitaanikkut isumannaarneqartumik. Neqerooruteqartitsineranut atugassiani agguassinissamut tunngavigisassat sorliit pingartinneqarnerisut, qanorlu tulleriisinneqarnerisut allasimasassapput.

*Suut tamaasa akuersissuteqarfignersinnissaat Kommune Kujalliup tulluarsorinngilaa.*

Suut tamaasa akuersissuteqarfiunissat siunnersuummut siunertaanngilaq. Immikkoortortat sorliit akuersissummut atugassiarineqarnissaat, kiisalu suliaq sorleq akuersissuteqarfiussanersoq pilersarusiornermut oqartussaaffimmit aalajangiunneqarsinnaavoq.

*Akuersissuteqarnermut tunngatillugu ingerlassani qaleriissitsisoqarsinnaanerup isumaliutiginnissaa Kommuneqarfik Sermersuup kaammattuutigaa, kissaatigalugu assersuutigalugu eqqakkanik piiaanissamut piumasaqaatit aalajangersaavigineqarnissaat.*

Akuersissuteqarnermut piumasaqaatini akuersissutip sivitsorneqarsinnaanera pillugu qaqugukkut qinnuteqarsinnaasoqarnera allasimassaaq.

*Annertunerusumik sanaartornermik pilersitsinissamut sanaartortitsisumut akuersissuteqarfiup sivikitsup kajujuummisitsissannginnera Nunamut namminerumut, Pinngortitamut Avatangiisinullu Naalackersuisoqarfiup nalunaarpaa. Akuersissutip ukiunik 30-nik siviussusissaanik killilersuinerup annertuunik aningaasaliissuteqarusunnginnermik nassataqarnissaa Visit Greenlandip nalunaarpaa.*

Aningaasaliinernik annertunerusunik aamma akuersissut ukiut 30-t tikillugit siviussuseqartoq kajungersaanissaminut naammattoq nalilerneqarsimavoq. Nunarsuarmi sumiiffinnit allanit tamaatut piffissalersuutaasut ilisimaneqarput. Oqaaseqaatini allasimavoq ukiut 30-t qaangiunerini akuersissummik nutaamik qinnuteqartoqarsinnaasoq. Akuersissutinut tamanut atatillugu piumasaqaatit ataasiakkaat aalajangerneqartassapput. Akuersissuteqarfiit

sivissusaasa suliniimmut tigussaasumut aningaasaliissutit pisariaqartitat takutissavaat. Taamaalilluni qinnuteqartoqaqqissinnaanerup naammaginartumik erseqqarissutut allassimanagera isikkoqarpasippoq. Oqaaseqaat allannguissamut tunngavissiisimangilaq.

*Immikkoortortat pineqartut isumagineqarnissaannut aningaasassaqaarniassammata atuinissamut akileeqqusissut nunap immikkoortuata kommunianut pineqartumut toqqaannartumik ingerlateqqinneqartariaqartut Qeqqata Inuussutissarsiutitigut Siunnersuisoqatigiivi isumaqarput.*

Akuersissutaasumut imaluunniit nakkutilliinermut atatillugu oqartussaaffimmit suliaqarnermut akiliut oqartussaaffimmut suliamik tigussaasumik suliaqartumut tutsinneqassaaq. Akitsuutaasinnaasut Nunatta Karsianut tussapput.

*Kikkunnut qularnaveeqqusiisoqassanersoq § 23-mi erseqqissumik allassimanginnera Visit Greenlandip nalunaarpaa.*

§ 23-mut oqaaseqaatit imatut erseqqissaavigineqarput tamanna erseqqissumik takussaaterlugu, nalunaarutaasorlu taamaalilluni akuersaarneqarpoq.

*Atuisinnaassusertut iluseqartumik kinguaariit arlallit piniariartarfimmik atuinerannut taakkununga ileqqutigut akuersinissamut tunngavissaqaqarnersoq ICC-p apeqqutigisimavaa, atuisinnaassusertullu ilusilikkatut nunaminertanik atugaqarnermik tunniussaqaarnermut tunngatillugu inatsisiliornermut pissuseq tamanna isumaliutigisariaqarluni. Sumiiffinnik tamakkunanik unammillertoqartillugu najugaqarfimmi attuumassuseqarneq sanioqqutassaangitsutut pingaaruteqassuseqarpoq.*

Inatsisitigut pisinnaatitaaffioreersut akuersissummik piginnittumit ataqqineqassapput. Taamaattumik ileqqutigut pisinnaatitaaffigisat ataqqineqassapput.

*Siunnersuutip utertinneqarnissaanik Qaasuitsup Kommuniiani Aningaasaqaarnermut Ataatsimiititaliaq qinnuteqarpoq, pisariaqartitsinermillu missiliuutigineqartuni malittarisassiornissamut allanik periarfissaqaqarnera pillugu soqutigisaqaqatigiinnik oqaloqateqarnerit aallarnisarneqaqqullugit.*

Ukiorpassuannortuni Namminersorlutik Oqartussat takornariartitsinermik ineriartortitsinissamik ingerlatseqatigiiffiata Visit Greenlandip Kalaallit Nunaannilu takornariaqartitsisoqarfiup akornanni qanimut oqaloqatiginnilluni piareersaatit suliaqarnerup siunnersuut inernerivaa. Aammattaaq takornariaqarnermi sularisanut akuersissutissanut iluserititaasinnaasut pillugit soqutigisaqaqatigiinnik pingaarutilinnit tamanik peqataaffigineqartunik arlalissuarnik ataatsimiittoqartarsimallunilu seminareqartitsisoqartarsimavoq.

UKA2011-mi Sukisaarsaatigalugu aalisarneq pillugu Inatsisartut inatsisaat akuersissutigineqarpoq, tassaavorlu inatsit immikkut ittoq, sukisaarsaatigalugu aalisartoqarfimmi akuersissutinik malittarisassiuisoq. Naalagaaffigisami takornariaqarnermut periusissiaq 2012-2015, 2012-imi aasakkut Naalakkersuisunit akuersissutigineqartoq tassarpiaavoq nunatami sumiiffinni toqqartukkani takornariaqartitsilluni suliaqarnermut akuersissuteqarneq pillugu inatsimmi sinaakktissatut piumasaqaataasunit pingaarnerpaat ilaat. Taamaattumik siunnersuutip oqaluuserineqarnissaa aalajangiusimaneqarpoq.

## **Inatsisissatut siunnersuutip aalajangersagaanut ataasiakkaanut oqaaseqaatit**

### *§ 1-imut*

Aalajangersakkami pissutsit siunnersuummut ilaasut eqqartorneqarput. Tassani oqariaatsit taagorneqarput: takornariatitsinermit ingerlatsinermit akuersissut, piginnaatitsissummik pigisaqartoq, suliarinnittut, sammisat takornariatitsinermit ingerlataqarnissamut akuersissuummut ilaatinneqartut, takornariatitsinermit niuerutissat, takornariat aamma takornariatitsinermit ingerlatat. Oqariaatsit ataani nassuiaateqarfigineqarput.

### *§ 2-mut*

Aalajangersakkami eqqaaneqarput siunnersuutip atuuffigigai illuutit najugaqarfiusut, illuutit allat, sanaartukkat, ilusilersukkat, aqqusernit attaveqaatillu allat il.il. Oqariaatsimi *ilaallu ilanngullugit* eqqaaneqarput tamakkuninnga taaguineq tamakkiisuunngitsoq. Tassaasinnaapput illuutit allat, sanaartukkat assigisaallu inatsisip aalajangersagaanut aamma ilaatinneqartut. Illuutit, aqqusernit, sanaartukkat il.il. nunami inissinneqarsimasut imaluunniit Kalaallit Nunaata imartaani 200 sòmilit iluanni inissinneqarsimasut, tak. qulaani § 2-mut aalajangersakkani, tassaasinnaallutik inatsisip aalajangersagaanut ilaasut, tamakku takornariatitsinermit niuerutissanik inatsimmut ilaasunik neqerooruteqarnermut, tuniniaanermut imaluunniit tunniussinermit atatillugu atorneqarpata. Oqariaatsit neqeroorut, tuniniaaneq aamma tunniussineq atorneqarput. Taaguutini taakkunani erseqqissaatigineqarpoq, inatsimmi aalajangersakkani ilaasut takornariatitsinermit niuerutissanik neqerooruteqarneq kiisalu tuniniaaneq, takornariatitsinermit niuerutissanik tamakkuninnga tunniussinerit.

### *§ 3-mut*

Aalajangersakkami takornariaq, takornariatitsinermit niuerutit aamma takornariatitsinermit ingerlatat nassuiaatigineqarput.

Siunnersuut malillugu takornariatut isigineqartoq tassaavoq inuk takornariatitsinermit nioqqutissamik pisinissani pillugu isumaqatigiissuteqartoq. Takornariaq takornariatitsinermit niuerutissamut taassumunnga akitsuummik akiliissaaq. Takornariatitsinermit niuerutissap suunera apeqqutaatillugu takornariap tuniniagaq atorsinnaavaa, namminerlu ingerlatassaminik isumaginilluni, assersuutigalugu sumiiffimmi immikkut ittumi pisuttuarnissaminut imaluunniit sisoraasersornissaminut periarfissiinneqarluni, imaluunniit takornariat

ingerlatassaq piginnaatitsissummik pigisaqartoq (taassumaluunniit sinniisaa) ingerlatassamik neqerooruteqartoq peqatigalugu ingerlassinnaallugu, soorlu qulimiguulimmik angalaarneq.

Takornariaq pillugu nassuiaataa tassaavoq sumiiffinni immikkut ittuni takornariatitsinermi niuerutissat ilaannik neqeroorut tunisinerlu eqqarsaatigalugit immikkuullarissuunissaanik periarfissaqartitsinerup eqqarsaatigineqarnera aallaavigalugu aalajangerneqarpoq, ilutigitillugulu sumiiffinni najugaqartut angalaarsinnaatitaanerannut pisinnaatitaaffiink annikillisaannginnissaq qulakkeerinneqataalluni. Takornariap nassuiaasersornerani inuiaassutsimut imaluunniit najugaqarfimmuut attuumassuteqartunik toqqaasoqanngilaq. Taamaalilluni inatsisip nassuiaatai aallaavigalugit najugaqarfigisap eqqaani takornariaasoqarsinnaalluarpoq – takornariatitsinermi kiffartuussummik neqerooruteqartumut akiliteqarnikkut pissarsinissaq pillugu isumaqatigiissuteqaraanni. Takornariarli pillugu siunnersuutip nassuiaataa kinguneqassaaq, inuup ataatsip ingerlatat assigiit sumiiffimmilu tassani takornariatitsinermi ingerlataqarnermut akuersissummumut ilaasut isumagisinnaagunigit, inuup inummumut allamut suliffeqarfimmulluunniit akiliteqarani sammisassaq isumagisinnaajuartillugu.

#### Imm. 2-mut

Takornariatitsinermi niuerutissaq tassaavoq kiffartuussut akiliinikkut tunniunneqartoq. Sammisassaq takornariap nammineeirluni isumagisinnaammagu, takornariatitsinermi niuerutissaq ingerlatassamut tamatumunnga isumaginninnissamut periarfissaasinnaavoq, assersuutigalugu takornariaq sumiiffimmi immikkut ittumi pisuttuarnissaminut innersuunneqarsinnaappat, pisuttuarsinnaanerlu taanna tassaavoq takornariatitsinermi niuerutissaq. Takornariatitsinermi niuerutissaq sermimut uninngaannartumut ingerlanissaq pineqarpat, qularnanngitsumik aaqqissuussisumik ilaqartoqassaaq. Takornariatitsinermi niuerutissamut aamma ilaasinnaapput kiffartuussutinik attuumassuteqartunik pissarsineq, tamakkununnga ilaallutik atortut attartorneqarsinnaasut. Tamakkunungattaq assersuutigalugu ilaasinnaapput assartuineq, nerisaqarneq, imigaqarneq unnuinerlu.

#### Imm. 3-mut

Takornariatitsinermi sammisat assigiinngitsorpasuisinnaapput, sukisaarsarnermik siunertalimmik ingerlatatut, inuussutissarsiuteqartumut akiliteqarnikkut neqeroorutaasartutut nassuiarneqarluni.

Taamaalilluni siunnersuut ingerlatamut namminerisamik inuussutissarsiutigisamut imaluunniit nammineq isumagisatut ilaatitatut suliarineqartumut tunngasuunngitsuunera erseqqissumik takusassaavoq.

#### § 4-mut

Akuersissummumut suut ilaatinneqarnerisut aalajangersakkat nassuiaateqarfigaat. Takornariatitsinermik ingerlataqarnerisamut akuersissut sumiiffinnut immikkut ittunut ingerlatanullu immikkut ittunut killilersimatinneqarput.

Imm. 2-mut

Piginnaatitsissummik pigisaqartoq tassaavoq inuk imaluunniit inuk inatsisinut attumassuteqartoq, akuersissummik tunineqarnermigut sumiiffimmi erseqqinnerusumik killilerneqarsimasumi takornariatitsinermi niuerutissanik erseqqinnerusumik aalajangerneqarsimasunik neqerooruteqarnissamik tunniussinissamillu pisinnaatitaaffimmik pissarsisimasoq. Akuersissummik tunineqarneq piginnaatitsissummik pigisaqartumut pisussaaffinnik malitseqarpoq. Pisussaaffiit inatsimmi, tassunga atatillugu nalunaarutitut kiisalu akuersissuteqarnissamut piumasaqaatini aamma akuersissutitut ataasiakkaanut akuerineqarnermi piumasaqaatini allassimapput.

#### *§ 5-imut*

Sammissassat takornariamut pissarsissutaasinnaasut saniatigut takornariatitsinermi sammissassanik tunniussisinnaanerup saniatigut ingerlataqarnissaq pisariaqalersinnaavoq. Assersuutigalugu sumiiffik orninniagaq immaqa piareersaqaarneqassasoq aamma/imaluunniit taassuma kingorna saliineqartariaqarluni. Imaassinnaavoq illumik sanasoqaaqartoq pisuttuarfissanillu pilersitsisoqaaqarluni. Tamakku takornariatitsinermi sammissavinnut ilaangikkaluarput, takornariatitsinermit sammissaqarnissap ingerlanneqarnissaanut pisariaqarsinnaassallutik. Sammisat tamakku takornariatitsinermi sammissaqavinnerup saniatigut ingerlataasut, akuersissummik taamattaq ilaatinneqarput, akuersissuteqarnissamullu piumasaqaatini taamaalilluni naleqqussarneqarsinnaallutik.

Imm. 2-mut

Aalajangersakkap taassuma sammisat takornariatitsinermi ingerlataqarnermi akuersissutit ataaniittut killilersuiffiginissaannut Naalakkersuisut periarfissippai. Taamaalillutik assersuutigalugu qimussernerup akuersissummik qaqugukkulluunniit ilanngunneqarsinnaanginnera pillugu Naalakkersuisut malittarisassianik aalajangersaasinnaapput.

#### *§ 6-imut*

Sumiiffiit takornariatitsinermi ingerlataqarnermi akuersissutitut ilaasut killilersuilluni toqqartornissaannut Naalakkersuisut aalajangersakkap periarfissippai.

Imm. 2-mut

Aalajangersakkami allanneqarpoq, akuersissuteqarnissamut piumasaqaatini sumiiffik ataaseq arlallilluunniit killilersornissaannik aalajangersaasoqarsinnaasoq. Tassaasinnaavoq sumiiffik aallaaniarneq, sisorariarneq allalluunniit eqqarsaatigalugit pilerinartuusoq, naatsorsuutigineqarsinnaallunilu takornariatitsinermit inuussutissarsiorneq takornariatitsinermi kiffartuussutitut tunniussinissamut immikkut pisinnaatitaaffeqarluni sammissaqartunut kaaviiartitsinerit amerlinissaannik angusaqartoqarsinnaalluni.

Naalakkersuisut sumiiffimmut aalajangersimasumut akuersissuteqarnissamut piunasaqaatini maleruagassanik aalajangersaappata, siunnersuutip kapitaliata 5-iani neqerooruteqarnissamut aalajangersakkat malillugit sumiiffik akuersissuteqarnissamut Naalakkersuisut neqerooruteqartitsisariaqartut. Piginnaatitsissummik pigisaqartoq pigisaqartulluunniit sumiiffimmut killilersimasumut akuersissummik tunineqarpata, sumiiffimmi pineqartumi tamatuma kingorna akiliuteqartitsilluni takornariatitsinermi ingerlatanik tunniussisinnaassapput. Sumiiffimmi aalajangersimasumi takornariatitsinermi niuerutissanut akuersissummut piunasaqaatinik Naalakkersuisut maleruagassanik aalajangiisimangippata, piunasaqaammik taamaattumik peqartoqassanngilaq, siunnersuut manna malillugu sumiiffimmi pineqartumi takornariatitsinermi ingerlatassat naleqqussarneqarsimassanatik.

Sumiiffimmi aalajangersimasumi takornariatitsinermi niuerutissamut akuersissummut piunasaqaatinut maleruagassat suliarineqareerpata, neqerooruteqartitsinissaq aallartinneqassaaq. Qinnuteqaatit takkussuuttut aallaavigalugit ataaseq arlallilluunniit sumiiffimmut tassungarpiaq takornariatitsinermillu niuerutissamut neqerooruteqarfigineqarsimasumut ilaasumut akuersissummik tunineqartussaq toqqarneqassaaq. Piginnaatitsissummik pigisaqartoq imaluunniit piginnaatitsissummik pigisaqartut taamaallaat takornariatitsinermi niuerutissamik tunniussinermi akiliisitsisinnaapput.

#### Imm. 3-mut

Aalajangersakkami allassimavoq, akuersissut allat sumiiffimmi inatsisinik unioqutitsinani angalaarsinnaanerannik mattussissanngitsaq.

#### Imm. 4-mut

Aalajangersakkami aalajangerneqarpoq sumiiffimmi takornariatitsinermi nioqutissamut akuersissuteqarnermi piunasaqaat pinngitsoortitsissanngitsaq, takornariatitsinermi nioqutissanik allanik tamatumunnga atatillugu kiffartuussutinik allanik tamatumunnga attuumassuteqartunik sumiiffimmi tunniunneqarsinnaasut. Aalajangersakkami aamma inissinneqarpoq, kikkulluunniit sumiiffimmi takornariatitsinermi niuerutissanik kiffartuussutinillu allanik tamatumunnga attuumassuteqartuni tunniussisinnaasoaq, inatsisartut inatsisaat manna inatsisilluunniit allat aalajangersakkalluunniit allat allanik aalajangersaasimangippata.

#### § 7-imut

Aalajangersakkami aalajangerneqarpoq takornariatitsinermi ingerlatassamut akuersissut kisermaassiffiusutut tunniunneqassasoaq. Suleqatigiiaat arlallit sumiiffik agguarusukkunikku suliffeqarfimmik ataatsimoorussamik akuersissummik qinnuteqartussamik pilersitsisariaqarput.

#### § 8-mut

Takornariartitsinermi ingerlatamut akuersissut periutsit assigiinngitsut marluk atorlugit tunniunneqarsinnaavoq. Periutsit taakku marluk qinnuteqaqqusilluni aggersaanermi periutsimut atorneqartumut naleqqiullugit allaanerupput. Siulleq tamanik nalinginnaasumik aggersaanertut taaneqarpoq (neqerooruteqartitsineq), tullia tamanut immikkut aggersaanertut taaneqarluni (neqerooruteqartitsineq immikkut ittoq).

#### Imm. 2-mut

Aalajangersakkat kingunerissavaat qinnuteqaqqusilluni tamanik aggersaaneq nalinginnaasoq, neqerooruteqartitsineramik taaneqartoq, takornariartitsinermi ingerlatamut akuersissutip tunniunneqarnissaa siunertarineqarpat. Tamatumunnga tunngavigineqarpoq sumiiffiit pilerinartut takornariartitsineramik inuussutissarsiuteqarnermik isumaginninnissamut suliffeqarfiit arlaqartut peqataatinnerisigut unammilleqatigiisittarnissaat kissaatigineqarmat. Nalinginnaasumik tamanik neqerooruteqartitsinermi qinnuteqarnissamut piffissaliussaq sivikinnerpaamik ullut 45-it sioqqullugit Naalakkersuisut tamanut saqqummiutissavaat. Tamanut saqqummiussineq Naalakkersuisut nittartagaatigut allatigulluunniit pissaaq, soorlu tusagassiuutitigut.

#### Imm. 3-mut

Aalajangersakkami tamanut immikkut neqerooruteqartitsineq pineqarpoq (immikkut ittumik neqerooruteqartitsineq). Suleriaaseq taanna atorneqassaaq, sumiiffimmut takornariartitsinermik ingerlataqarnissamut pilersaarusiortigineqarsimangitsumut Naalakkersuisut qinnuteqaammik pissarsigunik, qinnuteqaallu suliarineqartariaqartoq Naalakkersuisullu isumaqarfigigunikku. Taama pisoqartillugu qinnuteqaat pilersaarusiormi oqartussamut Naalakkersuisut ingerlateqqissavaat, apeqquteqaatigissallugulu pilersaarusiormut oqartussaasup sumiiffik qinnuteqarfigineqartoq takornariartitsinermi ingerlatanut ilanngunneqassanersoq kissaatigineraa. Pilersaarusiormut oqartussap sumiiffik qinnuteqarfigineqartoq tamakkiisumik ilaannakortumilluunniit takornariartitsinermi ingerlataqarnermut pilersaarutiginiarlugu ilanngunniarlugulu kissaatigisimappagu, akuersissummi tunniussinissaq siunertarlugu Naalakkersuisut immikkut ittumik innuttaasunut ammasumik qinnuteqaqqusisinnaapput.

Taama immikkut qinnuteqaqqusineq imm. 2-mi taaneqartutut assinganik ingerlanneqassaaq, Naalakkersuisut nittartagaatigut imaluunniit tusagassiuutit assigisaallu aqutugalugit tamanut saqqummiussinikkut.

Periuseq tamanna neqerooruteqartitsineramik minnerusunik aallartitsinissamut periarfiissiivoq, takornariartitsineramik sammisaqartunit kaammattuinerit, tamanna tikillugu misilittagaasimasut assigisaallu tunngavigalugit siunertaqartutut nalilerneqarpat. Taama pisoqartillugu qinnuteqaat aallaaviusoq immikkut ittumik neqerooruteqartitsinermut atatillugu tunniunneqareersimasutut isigineqassaaq.

Imm. 4-mut

Aalajangersakkami aalajangerneqarpoq, imm. 3 malillugu apeqquteqaatit ullut 90-it qaangiutinnginnerini pilersarusiornermut oqartussaasup akussuteqarfigissagaa. Pilersarusiornermut oqartussaasoq taamaallaat aap-imi imluunniit naagga-mik akissuteqassaaq. Tamakkulu saniatigut inatsisitigut sunniutissanik sunilluunniit imaqqassanani.

Imm. 5-imut.

Aalajangersakkami aalajangerneqarpoq akuersissummik tunniussinissaq pillugu aalajangernissaq eqqarsaatigalugu Naalakkersuisut namminneq aalajangiisinnaassuseqartut, aamma qinnuteqaqqusilluni tamanik aggersaaneqarsimagaluarpalluunniit. Taamaalilluni qinnuteqaatit periutsit imm. 2-3-mi taaneqartut tunngavigalugit tunniunneqarsimasut tunngavigalugit takornariartitsineramik ingerlataqarnissamut akuersissut Naalakkersuisut tunniutinngitsuuissinnaavaat. Taamaalillutik takornariartitsinerami ingerlataqarnissamut akuersissummik Naalakkersuisut tunniussissallutik pisussaaffeqanngillat, tamanna pillugu qinnuteqartoqarsimagaluarpalluunniit, neqeroortitsinerami atugassiani tunngavigisassatut inississukkanik qinnuteqartuusut arlaannaalluunniit naapertuutsitsinngippata.

#### *§ 9-mut*

Aalajangersakkami eqqaaneqarput akuersissummik tunniussisarnermi toqqaasarnissamut piunnaasaqatit. Tamakku imm. 2-5-imi taagorneqarput. Taamaalilluni piunnaasaqatit inatsisinut ilaasutut suliaqarfitsigullu ilaasutut piunnaasaqataapput, sumiiffimmut ataatsimut qinnuteqartut arlaqartillugit naliliinernut ilaatinneqarsinnaasut. Toqqaanissamut piunnaasaqatit imminnut naleqqiullugit pingaarnersiorneqarnerat qinnuteqaqqusineranut aalajangersimasunut atatillugit aalajangerneqartarput. Taamaalilluni qinnuteqarnissamut piunnaasaqatit inatsisip imm. 2-5-ianni nalunaarsorneqarneri pingaarnersiutinertut paasineqassanngilaq.

Imm. 2-mut

Aalajangersakkami pineqarput toqqaanissamut piunnaasaqatini suliaqarfitsigut piginnaasat. Qinnuteqartup taamaattunik neqerooruteqarnerni, tuniniaanerni tunniussinernilu imaluunniit takornariartitsinerami niuerutissanik assingusunik imaluunniit taamaattunik siusinnerusukkut misilittagai toqqaanermi pingaartinneqassapput. Tamatumani pineqanngillat takornariartitsinerami niuerutissat taamaattut assingusulluunniit pingaartinneqanngillat, allaat aamma qinnuteqartoq kiffartuussutinik assingusunik misilittagaqaraluarpalluunniit. Takornariatsitsinerami ingerlatassatut pilersaarutit isumagisinnaaneritut piginnaatitsissummik pigisaqartoq suliaqarfitsigut piginnaasanik pisariaqartitanik piginnaasaqartussaavoq. Tamatumani suliffeqarfik illersorneqarsinnaasumik imminullu akilersinnaasumik ingerlatissagaanni tamakku tunngaviusussaammata.

Imm. 3-mut

Aalajangersakkami pineqarput toqqaanermi piunnaasaqatini aningaasarsiornikkut tunuliaqutit. Toqqaanermi qinnuteqartup aningaasarsiornikkut tunuliaqutai pingaartinneqassapput.

Qinnuteqartup takornariartitsinermi niuerutissanik neqerooruteqarnissamut tunniussinissamullu ingerlatsinernut atatillugu aningaasartuutit siunertaqartumik nammassisinnaassagunigit aningaasarsiornikkut tunuliaqutai pisariaqartinneqartut akuersissummik tunineqarnissamut tunngaviussapput pingaaruteqarluinnartut.

Imm. 4-mut

Toqqaanissamut tunngavigisaq marlunnik erseqqissaatit eqqarsaatigisassartaqarpoq. Akuersissummik pissarsisinnaassagaanni qinnuteqartoq niuerutissaminik naammaginartumik nittarsaassisinnaaniassaguni aningaasarsiornikkut aalajangersimasumik piginnaaneqartariaqarpoq, taamaalilluni pisisartunik kajungertitsisinnaassalluni, akuersissummik pigisaqartumut inuiaqatigiinnullu aningaasarsiornikkut siuariartornermik pilersitsisinnaasumik.

Taamatuttaaq oqimaaqatigiissitsissutaassapput qinnuteqartuusup suliffeqarfinnik pilersitsinissamut aamma najugaqarfimmi pilersuisartunik atuinissamut siunnersuutigisai.

Imm. 5-imut

Aalajangersakkami pineqarput qinnuteqartut arlallit naligiissappata arlaat akuersissummik tunineqassanersoq pillugu inaarutaasumik aalajangiiniarnermi saniatigut piumasaqaateqarnissamut atugassamik Naalackersuisut aalajangersaanissaannut periarfissaq. Saniatigut aalajangersakkat tamakku tulluartsuussapput, suliaqarfitsigut tunngassallutik kiisalu kinaassusersiortuususaanatik. Aalajangersagaq imm. 2-5-imi toqqaanissamut piumasaqaatit misissorneqareernerisigut, qinnuteqartullu naligiissutut nalilersorneqareernerisa kingorna aatsaat atorneqalersinnaavoq. Ima paasineqassalluni, toqqaanissamut piumasaqaatit imm. 5-imi taaneqartut Naalackersuisut aalajangersarsinnaasaat, aatsaat atorneqalissammata toqqaanissamut piumasaqaatit allat nalilersorneqareeraangata, taakkulu aallaavigalugit qinnuteqartut marluk imaluunniit qinnuteqartut arlallit akuersissummik tunineqarnissaq eqqarsaatigalugu naligiissutut nalilerneqartut akornanni toqqaasoqarsinnaanngikkaangat.

Imm. 6-imut

Tassani ilisimatitsissutigineqarpoq neqeroorutini tamani toqqaanermi piumasaqaatit pingaarnersiorneri tamanut saqqummiunneqartassasut. Tamanna pisassaaq qinnuteqaqqusinerup tamanut saqqummiunneqarnera ilutigalugu. Toqqaanermi piumasaqaatit akornanni naleqqiussilluni pingaarnersiuneq pillugu maleruagassanik aalajangersaanermi assersuutigalugu toqqaanermi piumasaqaatit pingaarnerit pingaarnerillu tullii atorneqarsinnaapput.

#### *§ 10-mut*

Aalajangersagaq immikkut neqerooruteqartitsinernut atatillugu immikkut attuumassuteqartussaavoq, takornariartitsinermi sammisaqartoq sumiiffimmi nalinginnaasumik neqerooruteqarfissatut siusinnerusukkut periarfissaqarfiusimanngitsumi

nammineq piumassutsiminik takornariartitsinermi akuersissummik tunineqarnissani siunertaralugu qinnuteqarsimappat. Tassani pisariaqassaaq akuersissummi sammisaqarnissamut eqqartorneqartut ilaatigut kommunimi nunaminertanik atuinissaq pillugu pilersaarutinut tulluussarneqartariaqassammat.

Nalinginnaasumik neqerooruteqartitsinermit atatillugu neqeroorutip pilersaarusiorneqarneranut sumiiffiullu suussusersineqarneranut atatillugu nunaminertanut aamma pilersaarusiornermut oqartussaq (assersuutigalugu kommuneqarfik) Naalakkersuisut suleqatiginissaat naatsorsuutigineqassaaq, ilaatigut pilersaarusiortarneq nunaminertanillu atuneq pillugu inatsisartut inatsisaat malillugit pilersaarutit aalajangersakkallu allat takornariartitsinermi sammisaqartitsiffiuniartut pilersaarutit akornanni ataqatigiissaarinissaq qulakkeerniarlugu.

Imm. 2-mut

Aalajangersakkami pineqarput, pilersaarusiortarneq nunaminertanillu atuneq pillugit inatsisartut inatsisaat malillugu nunaminertanut oqartussat (kommunalbestyrelsi imaluunniit Naalakkersuisut) imm. 1-im i piumasaqaatit pillugit aalajangertartussaasut.

#### *§ 11-mut*

§ 11-mi aalajangersakkami pineqarpoq piffissap akuersissuteqarfiusup sivilissusissaa. Piffissaq akuersissuteqarfiusup nalinginnaasumik aalajangerneqartassaaq takornariartitsinermi niuerutissanik pilersuinissap pineqartup sivilissusissaatut naatsorsuutineqarnera kiisalu tunniussinerni aningaasarsiornikkut iluanaaruteqarnissamik periarfissat eqqarsaatigalugit. Piffissaliussap sivitsornerata aalajangerneqarnissaani ilaatigut illuatungaatigut eqqarsaatigineqassapput piginnaatitsissummik pigisaqartup piffissap sivilissusup aalajangerneqarnissaanut soqutigisai, illuatungaatigullu piffissap taassuma sivilissuallaannginnissaanik oqartussat soqutigisaat, taamaalilluni tamatuma takornariartitsinermit inuussutissarsiornernup niuerfissaani pissutsit naammaginartumik ingerlaavartumillu tulluussartarnissaat piffissaq ima sivilissutigilissanngimmat akornutaalertussaalluni. Piginnaatitsissummik pigisaqartup nunami aalajangersimasumi (soorlu aningaasannaniutigineqarnissaa siunertaralugu) inuussutissarsiornermi ineriartortitsinissamik pilersitsiffiunngitsumik tulluanngitsumik sivilissumik ”issianissaanut” periarfissaq pinngitsoortinniarnearpoq. Taamaammat pingaaruteqartut isumaqarfigineqarpoq piginnaatitsissummik pigisaqartup uppersarsinnaassagaa, immikkuullarissumik pisinnaatitaaffigisani inuussutissarsiornermi ineriartortitsinissamut atorineqassasoq, piffissallu sivilissuallaanngitsup iluani suliffeqarfimmik aningaasarsiornikkut imminut napatissinnaasumik pilersitsisinnaanini uppersarsinnaassallugu.

Aalajangersakkami pineqarpoq takornariartitsinermit ingerlataqarnissamut akuersissut pingaarnertut malittarisassaralugu ukiut tallimat angullugit tunniunneqarsinnaasoq. Piffissalli sivilissunerutinnissaanut periarfissaqarpoq, tamannalu siunnersuutip imm. 2-ani allassimavoq.

#### Imm. 2-mut

Aalajangersakkami periarfissiineqarpoq pilersaarutinut immikkut annertungaatsiartunut takornariartitsinermi ingerlatassanut akuersissut ukiut 20-t angullugit tunniunneqarsinnaasoq. Taassumali pisariaqassusia pilersaarummi aamma sammisassatut pilersaarummi missingersuusiorderanilu allassimasussaavoq.

#### Imm. 3-mut

Takornariatsitsinermi ingerlatassanut akuersissut aallaavittut ukiunik tallimanik sivissuseqarpoq. Sivitsuinerit ukiut tallimakkaartut Naalakkersuisut akuerisinnaavaat. Nalilersuineq malillugu sivitsuineq piumasaqaatit allangortinnagit pisinnaavoq, niuerutiginninnissamut pilersaarut pilersaarutit malillugit ingerlassappat. Assersuutigalugu ingerlataqarnissamut pilersaarummi nassiunneqarsimasumi anguniakkat anguneqarsimappata. Piumasaqaatit allangortillugit sivitsuineq assersuutigalugu pissaaq, ingerlatsinissamut pilersaarutit akuerineqaqqaarsimasut tungaasigut pilersaarut malunnaateqartumik allangortinneqarsimappat.

#### Imm. 4-mut

Aalajangersakkap kingunerissavaa piffissaliussap kingusinnerpaamik ukiut 30-t sinnerpagit akuersissummik nutaamik qinnuteqartoqassasoq, taassuma piginnarnissaa kissaatigigaanni. Tamatuma kingunerissavaa nutaamik neqeroorteqartitsisoqarnissaaq, akuersissummik piginneqaartuusimasooq ilimanaateqartumik pitsaanerusumik inissisimasussaalluni, suliniutit akuersissutaareersimasup nalaani suliarisimasai iluaqutaallutik.

## **Kapitali 5**

### *Piginnatitsissummik pigisaqartoq*

Pisumi aalajangersimasumi suliaqarfitsigut piginnaasaqarnermut aningaasarsiornermullu tunuliaqutit piumasaqaatigineqartunut pilersaarummut aalajangersimasumut apeqqutaatsineqassaaq, tamakkununga ilaallutik assersuutigalugu ingerlatassat annertussusii, ajornakusuussusii, aarlerinaateqassusii assigisaallu. Aalajangersakkap ilaatigut kingunerissavaa inuk/inuit imaluunniit suliffeqarfiit akuersissut malillugu piginnatitsissummik pigisaqarnermut ilannguttut, piffissami akuersissuteqarfiusumi tamarmi suliaqarfitsigut piginnaasanik pisariaqartitanik aningaasarsiornikkullu naammassinnissinnaanernik pisariaqartitanik pigisaqassasut. Aalajangersakkat ilaatigut qulakkiissavaat, akuersissut malillugu ingerlatat takornariartitsinermi niuerutissanik neqeroorteqarneq, tuniniaaneq tunniussinerlu pillugit inatsisip siunertai malillugit isumannaallisaaneq, peqqissuseq avatangiisillu eqqarsaatigalugit illersorneqarsinnaasumik siunertaqartumillu ingerlannissaannut eqquutsitsissasut. Taamattaq aalajangersagaq akuersissummik tunniussinermut atatillugu aamma attuumassuteqartussaavoq.

### *§ 13-imut*

Takornariartitsinermi ingerlataqarnissamut akuersissut inunnut suliffeqarfinnullu tunniunneqarsinnaavoq.

#### *§ 14-imut*

Aalajangersakkami pineqarpoq inummut tigussaasumut piginnaatitsissummik pigisaqartumut piumasaqaatit.

Qinnuteqaqqusinermut atatillugu piumasaqaatit sisamat eqquutsinneqarsimanersut pillugu Naalackersuisut uppersaatit piumasaqarsinnaapput. Piumasaqaatit inuit allattorsimaffiat aamma akileraartarnermi oqartussat aqutugalugit misissorneqarsinnaapput. Piumasaqaatit avaqqullugit immikkut akuersissuteqarnissaq pillugu inatsisartut inatsisaanni ilanngussisoqarsimanngilaq.

Imm. 2-mut

Akuersissummut tunniunneqartumut tunngaviit piffissap akuersissuteqarfiusup ingerlanerani allannorteqqusaanngillat. Akuersissummik tunniussinermi tunngaviit akuersissummik tunniussinermi tunngavigineqartut aallaavigineqarput. Taamaammat tunngaviit tamakku allaavigineqartut tamakku allannortinneqarpata piumasaqaatit akuersissummik tunniussinermi tunngavigineqartut piginnaatitsissummik pigisaqartup eqquutsitsineratut qularnanngitsumik atorunnaassapput.

#### *§ 15-imut*

Aalajangersakkami pineqarpoq ingerlatseqatigiiffimmut piginnaatitsissummik pigisaqartumut piumasaqaatit.

Qinnuteqaqqusinermut atatillugu piumasaqaatit eqquutsinneqarsimanersut uppersaaserniarlugit Naalackersuisut piumasaqarsinnaapput.

#### *§ 16-imut*

Aalajangersakkami Namminersorlutik Oqartussanut akiliutinik akiliisarneq pineqarpoq. Aalajangersakkat oqaasertalersorneranni "akiliutinik akiliisarneq"-rup erseqqissaassutigaa akileraarutinik akiliteqartarnissaq pineqanngimmat. Aalajangersagaq malillugu akuersissummi piumasaqaatini piumasaqaatinik aalajangersaasoqarsinnaavoq piginnaatitsissummik pigisaqartoq makkununga akiliteqartassanersoq; nunaminertamik atuinermut akitsuut, niurutigisanut akitsuut, iluanaaruteqarnernit akitsuut imaluunniit atuinermut akitsuut.

Akiliutinik akiliteqartarnissamut periarfissap atuutilernerani Landskarsip takornariartitsinermik inuussutissarsiortunut nunaminertanik kisermaassilluni tunniussinermigut tamakkunanga aamma isertitaqarsinnaanini qulakkiissavaa.

### *§ 17-imut*

Ingerlataqarnissamut pilersaarutip imarissavai ingerlatat taavalu illut sanaartukkallu allat atornerqarneri. Pissutsit allanngorpata, tassa sammisat allanngorpata imaluunniit illut sanaartukkallu allat atornerqarneri allanngorpata ingerlataqarnissamut pilersaarut nutartigaq Naalackersuisunut akuerisassanngorlugu nassiunneqassaaq.

### *§ 18-imut*

Aalajangersakkap imaraa takornariatitsinermi akuersissummut ilaasut pillugit piginnaatitsissummik pigisaqartup nalunaarusiortarnissamut pisussaaffeqarnera pillugu aalajangersakkat. Aalajangersakkami oqaatigineqarpoq nalunaarusiorneq akuttunngitsumik isumagineqartassasoq, qanorli akulikitsigisumik isumagineqartassanersoq eqqaanagu. Akulikissusissaq pillugu aalajangersagaq assersuutigalugu akuersissummi piumasaqaatini imaluunniit ingerlatamut ataatsimut akuerineqarnermi piumasaqaatini aalajangersarneqarsinnaavoq.

Imm. 2-mut

Aalajangersagaq pisinnaatitsissuteqarpoq akuersissutinut assigiinngitsunut atatillugu Nalunaarusiornerit qanoq ittut nalunaarutigineqartarnissaat pillugu Nalunaarummik Naalackersuisut suliarinnissinnaasut. Nalunaarusiat suuneri allanngorarsinnaapput, soorlu qulimiigulik atorlugu sisorariatortitsisarnernit kiisalu inuilaarsuarmi illuaraliornissamut akuersissummut. Aalajangersakkami tamakkununga nalunaarusiornissamut piumasaqaatit attuumassuteqartut suliarineqartarnissaat pillugu pisinnaatitsineqarpoq.

## **Kapitali 8**

*Akuersissuteqarneq malillugu takornariatitsinermi ingerlatat pillugit ingerlatallu taamaatinneqarneranni pisussaaffiit*

### *§ 19-imut*

Aalajangersakkami qulakkeerneqassaaq akuersissuteqarnerup taamaatinnerata kingorna sumiiffik akuersissuteqarfiusoq qanoq ilillugu utertinneqarnissaa pillugu piumasaqaatinik suliarinnittoqassasoq.

Imm. 2-mut

Qularnaveeqqusiinerup qanoq ittuunissaa qanorlu annertutiginissaa pillugu piumasaqaatinut aalajangersimasunut apeqqutaassaaq ingerlatap qanoq annertutiginera, ajornakusoortiginera, aarlerinaateqarnera assigisaallu.

Imm. 3-mut

Aalajangersakkami pineqarpoq piginnaatitsissummik pigisaqartup peqqussutit Naalackersuisut saqqummiussimasaat eqquutsinngippagit, Naalackersuisut piginnaatitsissummik pigisaqartup akiligassaanik saliinermik assigisaannillu isumaginnitsisisinnaasut. Tamannali sioqqullugu piginnaatitsissummik pigisaqartoq iliuousissanik imm. 1-imi taaneqartunik isumaginninnissaanut peqquneqarsimasariaqarpoq.

*§ 20-mut*

Aalajangersakkami pineqarpoq takornariatitsinermi ingerlatamut akuersissut Naalackersuisut akuersiteqqaarnagit tunineqarsinnaanngitsoq. Tunniussineq pisinnaavoq toqqaannartumik tunisinikkut, akuersissut immiini piginnaatitsissummik pigisaqartumit piginnaatitsissummik pigisaqartumut allamut tunineqarluni, imaluunniit toqqaannanngitsumik tunineqarluni, akuersissut immiini tunineqarnani, kisiannili piginnaatitsissummik pigisaqartoq tunisinermik isumaginnittuulluni. Tamanna assersuutigalugu pisinnaavoq piginneqatigiissutinik tunisinikkut imaluunniit piginneqatigiissutinik nutaanik suliarinninnikkut, tamakku ima annertutigissallutik suliffeqarfimmik aalajangiisumik sunniuteqartitsillutik, imaluunniit assinganik sunniuteqartumik isumaqatigiissusiornikkut.

Tunisinermut atatillugu oqartussat akuersinerisigut ilaatigut qulakkeerneqassaaq, akuersissummut tunngatillugu piginnaatitsissummik pigisaqartup pisussaaffimminik eqquutsitsinissamut tunngavigineqartut tunisinermi ajornerulersitsissanngitsut imaluunniit peerneqassasut.

*§ 21-mut*

Takornariatitsinermik ingerlatsinissamut akuersissut pissutsinik piumasaqaatinik akuersissuteqarnermik atorunnaarsitsinissamut imaluunniit akuersissummik utertitsinissamut kinguneqarsinnaasunik imaqartussaavoq.

Nalinginnaasumik periuseqarnek malillugu akuersissummik atorunnaarsitsinermik utertitsinermilu pisinnaatitsissummik pigisaqartup akuersissummut piumasaqaatit annertuumik unioqqutissimassaneramik piumasaqaataavoq. Tamakkununga ilaapput peqquneqarnerit siunnersuummi matumani pisinnaatitsissutaasut arlaleriartumik tusaanngitsuusaarneqarsimanerat, imaluunniit siunnersuut malillugu akuersissummut tunniunneqartumut piumasaqaatit atorunnaarpata.

*§ 22-mut*

Aalajangersakkap akuersissutip taamaatinneqareernerani piginnaatitsissummik pigisaqartup pisussaaffii pillugit maleruagassanik Naalackersuisut aalajangersaasinnaaneranunt periarfissippai.

### § 23-mut

#### Imm. 1-imut

Aalajangersagaq atorneqassasutut naatsorsuutigineqarpoq ingerlataqaneq ajutoornissamut assigisaannullu immikkut aarlerinaateqartutut nalilerneqarpat.

#### Imm. 2-mut

Aalajangersakkami eqqarsaatigineqarpoq takornariatitsinermi ingerlatat ilaat pinngortitami ingerlanneqarumaartut, nunanilu allamiunut pisortanit peqqissutsikkut sullinneqarnissaminnut piginnaatitaaffeqaangitsunut neqeroorutigineqartassasut. Taamaalilluni ingerlatat arlallit napparsimmavimmit qaninnerusumit ungasingaatsiartumi ingerlanneqarsinnaassallutik, imallu issinnaallutik, peqataasut pisut malillugit ajoqusernissamut aarlerinaatit akuerisimassagaat oqartoqarsinnaassalluni. Taamaattunik pisoqartillugu inuiaqatigiit ajoqusernermi aaneqarnissanut peqqissutsikkullu sullinneqarnissamut aningaasartuutunik artukkerneqartariaqarsorisussaanaatik, taamaammallu tamakkununga aningaasartuutaasinnaasunut sillimmasiinnikkut matussutissat pillugit piumasaaqatitnik iluarsineqarsinnaavoq, kiisalu akiliinissaq pillugu peqqinnissaqarfimmik isumaqatigiissusiorneqartariaqassalluni.

### § 24-mut

Aalajangersakkami pineqarput ingerlatat takornariatitsinermi ingerlataqarnermut akuersissummut ilaasut isumannaallisaaneq, peqqissuseq, avatangiisit eqqarsaatigalugit siunertaqartumik kiisalu illersorneqarsinnaasumik ingerlanneqassasut. Tamatuma saniatigut oqaaseqaatinut nalinginnaasunut innersuussineqarpoq.

### § 25-mut

Aalajangersakkami pineqarpoq Naalackersuisut oqartussaasutut nakkutilliisuusut. Naalackersuisut makkunanga nakkutilliisuupput; takornariatitsinermit ingerlatanik, takornariat sammisaat pissutsillu inatsisartut inatsisaannut ilaasut imaluunniit takornariatitsinermi ingerlataqarnissamut akuersissutit, takornarianut niuerutissat, aaqqissuisut, takornariatitsinermi ingerlataqarnissamut akuersissutit, sammisaqartitsinerit aamma illuutit sanaartukkallu il.il. takornariatitsinermi ingerlataqarnissamut akuersissutinut ilaasut, piginnaatitsissummik pigisaqartut, angalatitsisartut, suleqatigiinnissamut isumaqatigiissutit ingerlatallu allat pissutsillu allat inatsisartut inatsisaannut ilaatinneqartut. Kingullermik taaneqartumi oqaatigineqarpoq, Naalackersuisut nakkutilliinissaannut periarfissaat annertungaatsiartut inatsisartullu inatsisaanni ilaatinneqartunut tamanut attuumassuteqartut.

#### Imm. 2-mut

Peqqussuteqartarneq pillugu malittarisassat aalajangersakkami pineqarput. Aalajangersakkanik inatsisartut inatsisaannut ilaasunik imaluunniit inatsit malillugu eqquutsitsinngitsoornerit, tassaakkajullutik nalunaarummik imaluunniit akuersissuteqarnermi piunasaqaatinik, aalajangersakkanik eqquutsitsinissaq pillugu peqquneqarluni nalunaarutiginninnermik kinguneqarsinnaapput. Peqquneqarnermik nalunaarutiginninneq piginnaatitsissummik pigisaqartumut allanulluunniit inatsimmut ilaasunut nalunaarutigineqarsinnaavoq. Aalajangersagaq pisinnaatitsissummik imaqarpoq nakkutilliinermut oqartussaasoq, eqqartuussivimmit uppersaaseqqaarnani, suliffeqarfiup immikkoortuinut tamanut isersinnaatitaasoq aammalu ingerlaturanut inatsisartut inatsisaannut ilaasunut, nakkutilliisutut pisussaaffiit ingerlanneqarnissaannut tamanna pisariaqartinneqarpat. Eqqartuussivimmit uppersaaseqqaarnani isermermi sulisoq kinaassutsimik uppersaammik takutitsisussaavoq.

Imm. 3-mut

Naalackersuisut oqartussatut eqqortumik suliarinnissinnaassappata, tamakkununga ilaallutik siunnersuut malillugu ingerlattanik nakkutilliisarneq, paasissutissat pisariaqartinneqartut piginnaatitsissummik pigisaqartup nalunaarutigissavai. Paasissutissat Naalackersuisut aalajangigaattut ilusilerlugit nalunaarutigineqarsinnaapput.

#### § 26-mut

Aalajangersakkamut assersuutigalugu ilaapput sulianik suliarinninnermut, nakkutilliinermut, oqartussatut suliarinninnernut allanut, sulinnermut atatillugu angalanernut aamma avataanit siunnersuisunut siunnersuisartunullu assigisaannullu atatillugu aningaasartuutit.

Aningaasartuutit suulluunniit sullinneqarnermi akiliutitut, imaluunniit aningaasartuutinik utertitsinertut akilertinniarneqarsinnaapput, sullissinerit Naalackersuisunit tunniunneqartunut akiliutit naammattutut amerlassuseqassappata. Taamaalilluni siunertarineqanngilaq aalajangersakkami matumani pisinnaatinneqarneq aqutugalugu sullinneqarnermi akiliutinik imaluunniit aningaasartuutinik utertitsinermi Naalackersuisut suliami pineqartumi sulianik oqartussatullu suliarinninnermi aningaasartuutigisimasaat sinnerlugit imaluunniit atugassatut naatsorsuutigineqartut sinnerlugit akiliisitsiniartoqartassasoq.

Sullinneqarnermi akilititut paasineqassaaq, aningaasat amerlassusii oqartussatut suliarinninnermut aningaasartuutit oqartussat naliliineri tunngavigalugit naatsorsorneqarsimasut, aningaasartuutinilli utertitsineq paasineqassalluni, aningaasartuutaasimasut tunngavigalugit oqartussat akiligassiissummik nassiussinerat.

Sulianik oqartussatullu suliarinninnermi oqartussatut suliarinninnermi akiliutit piffissatigut atuinermi nalunaaquttap akunneranut akigititaasut tunngavigalugit pisinnaavoq, assersuutigalugu tamakkununga ilaallutik nakkutilliinermik isumaginninneq, kiisalu akuersissutinik akuerinninnermillu tunniussinerit.

### § 27-mut

Allanik inatsiseqarsinnaavoq aalajangersagaqartunik inatsisartut inatsisaat manna malillugu piginnaatitsissummik pigisaqartup pisinnaatitaaffiiniq naleqqussaasunik, assersuutigalugu pilersaarusiortarneq nunaminertanillu atuineq pillugu inatsit, avatangiisit pillugit inatsit, suliffimmi atukkat pillugit inatsit il.il. Inatsisit tamakku aalajangersagaat soorunami saneqqunneqarsinnaanngillat, piginnaatitsissummik pigisaqartoq inatsisartut inatsisaat malillugu takornariartitsinermi ingerlatassanut akuersissuteqarnera peqqutigalugu.

### § 28-mut

#### Imm. 1-imut

Aalajangersakkami pineqarpoq pisuni suni Kalaallit Nunaanni pinerluttulerinermut inatsit malillugu akiliisitsinermik pineqaatitsisoqarsinnaanersoq.

#### Imm. 2-mut

Aalajangersakkami piginnaatitsissut pineqarpoq, inatsisartut inatsisaat malillugu malittarisassani suliarineqarsimasuni akiliisitsinikkut pineqaatitsisoqarsinnaasoq pillugu aalajangersaasoqarsinnaasoq.

#### Imm. 3-mut

Imm. 2-mi taaneqartutut aalajangersakkat oqaasertalersorneqarpata, aalangersakkallu tamakku akiliisitsinissamik pisinnaatitsissappata, akiliitsineq Kalaallit Nunaanni pinerluttulerinermut inatsimmi malittarisassat malillugit inummut inatsisinut attuumassuteqartumut tutsinneqarsinnaavoq.

#### Imm. 4-mut

Imm. 3-mi pineqartut assigai, tassanilu arsaarinnissuteqartarneq pineqarluni. Tamatuma saniatigut taaneqarpoq arsaarinnissuteqarneq landskarsimut iluaqutissanngorlugu pissasoq.

#### Imm. 5-imut

Aalajangersakkanik imaqarpoq, akiliisitsinerit siunnersuut imaluunniit tamanna malillugu maleruagassat aalajangerneqarsimasut malillugit pineqaatitsiissutigineqartut landskarsimut nakkartinneqassasut.

### § 29-mut

Aalajangersagaq atuutitsilernissap ullua pillugu nalunaarinnippoq.